

嘉慶庚午年重修

沅江縣志

尊經閣藏版

沅江續修邑志序

我

國家重興累洽聲教四訖凡烏弋黃支
雕題窮髮之國莫不稽首來王隸與
罔而歸版籍觀於一統志所載遠稽
遐証纖鉅咸包伊古以來未有如

沅江縣志

卷一序

今日之盛者也願國史所書闕一代之典
章而郡邑亦有志乘以備一方之紀
載周禮職方氏掌天下之圖而又有
小史掌邦國之志誠以一方之紀載因
一代之書所取資也紀及時修理之不
可余以嘉慶丙寅恭膺



簡命來守常郡視篆之始即索舊志觀之
覺其勩而勿根晦而弗澤不失之繁而
失之畧且自

國初纂修以來迄今百數十年疆域之沿
革土俗之推移戶口田賦之增長人物
事蹟之繁盛諸無所考大懼文獻不徵

沅江縣志

卷一

序

二

無以揄揚

朝廷教化之隆遂建議續輯檄催四屬
志書將彙而理之而沅江則以舊志既
多舛漏自康熙三十五年後未嘗纂記
爰令重加採訪本年春新志告成予取
而觀之自星野至拾遺凡三十卷提挈

綱領詳而能賅蓋本之馬氏文獻通考
復參用湖南通志之例徵今攷古燦若
列眉亦可謂體大而思精也夫志之
難矣自龍門創為八書班氏易之為志
其後陳壽記三國乃以志名金書然前
人不以志名書而有志後人以志名書

而無志故江文通謂修史之難無踰於
志良有以也沅江居洞庭上游騷人之
所經歷比歲以來民日富庶文教亦蒸
蒸有喜色紀載缺如誠為欠事今觀是
志覺沅之山川人物為之生色豈甚矣
志之不可不修也是舉也知令唐君黎

君主其事教諭駱君董其成邑紳士始
終肩至勞又得陶雲汀太史為之討論
潤色其為力勤而集思精俾觀風者
有所采攷實者有所據蔚乎良史之裁
也於以教吹

庶明位今傳後雖一邑之志而

聖朝久道化成之盛徵諸此矣豈不懿歟

大清嘉慶十三年歲次戊辰孟春月

賜進士出身

誥授朝議大夫知湖南常德府事前吏
部文選司郎中乙卯科山西鄉試主
考丙辰科會試同考官加五級紀錄

十次江陰薛淇撰



沅江縣志

卷一序

五

重修沅江縣志序

乾隆甲寅秋余來司沅諭至之日考求此邦文獻亟索邑志披閱之志成於前邑令朱公前司諭李公善不善我未敢知第自康熙三十五年纂修後迄今百有餘歲矣山川疆里固可百世不易若

孝友節義人物著述因時繼起其遺文遺事欲與邑人士搜羅編葺以補闕畧適庠序中公事大工連年不輟物力維艱志焉未逮嘉慶丙寅冬

郡伯薛憲議修郡志檄飭四屬先將邑志底本呈核又以此事校官宜分厥任

復下其牒於學余乃商之邑令集邑人士而謀始焉顧以百餘年遺文遺事欲會萃於一時其為勢甚難幸邑老成楊君尚載素嘗留心於此者曾有頻年手錄世父麓北翁草稿規模粗具更擇邑中績學持重之士開局分曹互相斟酌

而損益之其潤色則屬之安化陶雲汀太史搜羅在丁卯之春編葺在是歲之秋至戊辰秋始付剞劂三閱月而告竣其為類三十為卷三十百餘年遺文遺事庶幾無闕畧矣夫自古記載之書文以紀事者曰詞章家唐之歐陽氏虞氏

白氏是也事以行文者曰典制家唐之杜氏宋之鄭氏馬氏是也茲志之成以事為質以文為輔綱者綱之目者目之由是而上之郡而彙之省會以脩

國史之採擇即以當層樓一楔可矣惟自顧襪線微長謬因脩官十數年聞見畧

周得與邑人士上下其議論而藉以附不朽幸何如耶爰述其顛末而序之

嘉慶十三年戊辰嘉平上浣之吉

教諭駱孔僕沐手譔



重修沅江縣志草稿序

楊尚載 邑人

古者小司徒掌邦國之史記言記動外史掌四方之史採山川民物風俗貞淫政事得失以獻於王今郡邑之志猶侯國之史披圖而索若奕之有局畫之有譜可不勞而就理所係不誠重歟顧志以垂信志其所無則失之罔志其所疑則失之誣昔人謂班固沒而後世不復有史非無史也事不核其實難以取信於奕禩耳然則職紀載者其可率爾操觚乎沅江舊有志草創成編未憊人意且迄今百數十年無有續者先世父麓北公有志纂輯未竟厥志以草本見付年來復加搜羅視其應

沅江縣志

卷一 序

九

纂入志者逐條逐款悉爲記載爲書六冊欲與邑之熟於掌故勇於公事者共勦成之又以邇來公舉甚繁貲費難繼弗克興理因自念年近八旬風前之燭難保不熄而邑中要務復無有踰於修志一事者倘遂沉漏過此以往稽考維艱漠然徒見山高而水清欲問其事則文獻盡矣可勝於邑哉爰錄存敝笥俟後之君子刪其繁而補其缺文其陋而質其膚則是編雖未敢擬諸良史之遺亦庶幾先民芻蕘之意也夫嘉慶十一年歲次丙寅仲夏月端午日序於梅子園居宅時年七十八歲

重修沅江縣志採訪啟

教諭駱孔僕 寧遠

蓋聞特筆昭諸麟史良於古獨有董狐大業擅自龍門
傳於今首推司馬列朝各垂紀載一邑亦有成書惟茲
沅邑地屬鼎州鍾瓊湖沙浦之靈毓赤巘慶雲之秀由
明遡宋甲乙榜之報捷殊多以後光前文武科之聯鑣
特盛山川有日新之氣象英賢多繼起之徽猷况激揚
乃教化攸關而節孝爲風俗所重扶輿清淑之氣不終
秘也固宜微顯以闡幽桑梓恭敬之鄉必有人焉足以
廉頑而立懦顧舊時之邑乘歷今日已百年亥豕魯魚
或可存而不論郭公夏五殊覺闕而未詳慨簡斷與編

沅江縣志

卷一 啟

殘宜旁搜而遠紹不佞矢懷彌切有志未遑苟文獻之
無徵將校讐其奚恃十數年之聞見風土粗知百餘里
之封疆網羅難遍欲與重開生面相期共抒素心庸德
庸行孰可書而兼可勸徵休徵咎必傳信而勿傳疑奚
以見酌古準今之咸宜若何得編年紀月之弗謬識其
大識其小不妨屈指而陳無作好無作惡所貴稱情以
出披芸香於帳裡欣看踵事增華得鴻寶於枕中迥非
因陋就簡庶幾集成善本遙分金匱石室之藏獲見完
書快比綠帙丹經之盛所有細目條列左方謹啟
一邑中孝子順孫義夫節婦貞女烈婦前志缺載及

修志後百年來所有之事或尚存姓氏里居或舊有行狀墓誌與現在令甲既符實跡堪據者不靳悉心搜羅蓋關係綱常名教卽爭光日月星辰務使潛德胥昭毋令遺珠致慨

一邑中建置沿革除舊志章程有定者勿論其一切牌坊橋梁義渡亭閣井洫寺廟可以肅瞻仰便行人利田功培地脈者不妨直指悉陳以脩形勝

一邑中詩文舊志所載寥寥無幾近代人文蔚起著作如林其無關志內閒題無庸濫入或流連古跡或闡揚風教與夫邑內山川名勝生面重開政治

沅江縣志

卷一 啟

二

廢興體要攸關者無論長篇短句靡拘舊事新聞既可藏之名山卽宜登諸信史

一邑中縉紳耆舊或施惠於來茲或有功於名教砥礪末俗堪爲立傳者務須臚列真跡毋得游揚虛譽抑果德與齒尊雖白衣亦列碩望倘或名因行敗卽朱綬不若山農文無濫觴事惟徵信

沅江縣志舊序

知縣 朱永輝

余往還都會數十年矣凡郡邑之興衰大小人民之聚散利病莫不歷歷見之憶昔待罪中州觀於大梁書院穆然想見孟子初至梁卽以義利之辨爲先他日又云進以禮退以義得之不得曰有命喟然曰義也命也乃吾人終身由之而不盡者一旦第名委贄以不相關涉之疆宇而俾之統之以不相屬離之人民而俾之子之甚無謂疆宇之小且衰人民之病且散夫亦委之於義命也昔人有云人苟一日立乎位則當盡一日之職一日受人之直則必一日終人之事庶兩無負兩相適也

沅江縣志

卷一 舊序

三

楚南洞庭一湖延袤數百里沅江其西汜也下濱湖水
上接資江蕭梁時始爲縣厥後遷改不常然立縣已千
年矣而傳志散佚無復存什一於千百欲問所爲人物
山川農田水利賦役戶口與夫興革繁簡以爲鑒視茫
然莫憑我

車書同萬檄徵天下郡縣各志以成一統會典而前之
幸茲邑者僅附刻於本郡其間郵夫之往返梓人之僱
覓費倍而志未就後任京江顧君搜求遺跡訂訛芟蕪
而志幾成值顧君奉

欽徵去而編次裒益竟委於庸俗人之手可勝悼哉余承乏

茲土凡興利除弊禦災捍患日無暇晷尤以志不獲成
爲歉於是商之紳士取原本而經理之條其目補其遺
且以鋪揚塗飾爲戒也必誌其可誌毋誌其不可誌於
以循文考事徵信而彰實余雖間有討論然以簿書之
冗兼之連攝數篆未遑細編至於五短三長又所弗計
也亦聊以盡一日之職終一日之事而遠承乎義命之
訓也茲纂輯告成畧書數言以弁其首云時康熙丙子
季夏書於夜香亭

沅江縣志舊序

知縣 金廷獻

楚南澤國也洞庭一湖延袤數百里巨浸稽天洪濤汨地日月吞吐其中實爲九江之滙而沅湘處其上游子自蒞任岳陽以來政事之暇輒登子京之樓坐睇青螺十二奇觀八百每思朗吟飛過求屈子所云沅芷澧蘭而一游焉以極楚南之大觀適辛未秋奉檄代篆沅江由湘水輕舟而至以爲昔日所遊思者庶幾遇之及入境則地曠民稀環沅皆水一望黃茅白葦至其邑則從古無城郭繞縣治而居者不過百餘家以竹代陶以漁爲業蕭條寂寞之象於楚南爲最余太息久之方思所

沅江縣志

卷一

舊序

五

以作興者維時邑適有修志之舉未幾告竣余取而閱之見夫上應星躔下列輿圖凡縣邑建制沿革之由物產土田之異學校壇壝祀典廢興之故與夫居其位者之能厥官產其地者之鍾厥靈璀璨藝林較若列眉焉讀荆公沅田桑柘可蠶耕君子其間恥射利之句又未嘗不嘆沅之風固自大有可爲者也夫沅邑雖稱蕞爾自宋唐子方臨此地而後以循良著績者不乏人邇來瘡痍漸起復得良有司經理而撫綏之雖厥田下下厥賦稱焉而荒於草萊者漸以墾其民雖拙於耕貪於漁而急於公賦者所在多有其風俗樸淳畧鮮刁競之習

士子雅尚詩書有絃誦之聲生聚而教訓之安見古今
人不相及耶予暫理此邑值清丈審造數大政屆期伊
邇又捐建義倉修葺宮牆方欲次第舉行無負一日親
民之任後之君子覽邑乘而流連相與聿觀厥成是予
之厚望也夫